

SARS E HOPOTSA BAREKISI BA VAT HO NEHELANA KA DIKGUTLISO TSA BONA TSE MORAO HO SENG JWALO BA TOBANE LE DIKGATO TSA MOLAO

Pretoria, Labohlano, 22 Phuptjane 2018 - Ditshebeletso tsa Lekgetho tsa Afrika Borwa (SARS) di hopotsa barekisi ba lefisang Lekgetho la Boleng bo ekeditsweng (VAT) ho nehelana ka dikgutliso tsa bona tse morao ho qoba dikotlo tsa tsamaiso le/kapa diqoso tsa bonokwane.

Ho latela Molao wa Tsamaiso ya Lekgetho wa Nomoro ya 28 wa 2011 (TAA), le ka ho qolleha Karolo ya 234 (d), ke tlolo ya molao ho se nehelane ka kgutliso ya lekgetho ya mofuta ofe kapa ofe wa lekgetho leo molefalekgetho a ingodiseditseng lona. Mefuta ya lekgetho ke ena:

- Lekgetho la Lekeno la motho ka bomong (PIT)
- Lekgetho la Lekeno la Kgwebo (CIT)
- Lekgetho la Lefa ha o ntse o fumana moputso (PAYE)
- Lekgetho la Boleng bo ekeditsweng (VAT)

Ho hloleha ho nehelana ka dikgutliso ka nako e behilweng ho ka nna ha baka hore ho be le dikotlo tsa tsamaiso ho latela kgutliso ka nngwe e morao. Sena se ka nna a boela se baka diqoso tsa bonokwane tse ka qetellang di bakile kotlo kapa ho hlola tjhankaneng.

Barekisi bohle ba lefisang VAT ba nang le dikgutliso tse morao, ho kenyeleditswe le bao ba ileng ba hloleha ho nehelana ka kgutliso lekgetho la pele, kapa ba sa kang ba nehelana ka kgutliso ya VAT201 ka nako bakeng sa Mmesa/Motsheanong 2018, ba tla fumana dikgopotso ka SMS kapa imeile ho tloha kajeno hore ba nehelane ka dikgutliso tseo tse morao.

Ho qoba dikotlo dife kapa dife, tswala, dikgato tsa molao mmoho le ho hlola tjhankaneng, balefalekgetho ba koptjwa ho lokisa maemo a bona a boikobelo ka ho nehelana ka dikgutliso dife kapa dife tse morao kapelenyana Lekaleng le haufi la SARS kapa ho SARS eFiling at www.sarsefiling.co.za.

Ho bohlokwa ho elellwa hore ebang kgutliso efe kapa efe e ka qetella e bakile sekoloto sa lekgetho, sekoloto seo se tlameha ho leshwa pele ho letsatsi la makgaolagang ho qoba tswala efe kapa efe ya tefo e morao mmoho le mehato ya molao. SARS e tla netefatsa hore dipusetso di a leshwa, ntle feela le ha eba ho na le mabaka a molao a etsang hore pusetso eo e se leshwe.

Barekisi bohle ba hopotswa ho nehelana ka ditsebahatso tse nepahetseng ka ha SARS e ka nna ya etsa oditi.

Ho fumana tlhakisetsa e fetang ena, balefalekgetho ba ka letsetsa SARS Contact Centre ho 0800 00 7277.